



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2011. GODINU **HRVATSKIH DEMOKRŠĆANA**

Broj: 03-07-6-402/12  
Sarajevo, 19. novembar 2012. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole .....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI.....	5
5.2. PREPORUKE .....	6

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatskih demokršćana za 2011. godinu.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

**1. Hrvatski demokršćani prekršili su odredbe člana 11. stav (1) i stav (3) Zakona o finansiranju političkih stranaka.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Hrvatskih demokršćana za 2011. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatski demokršćani su ostvarili ukupne prihode u iznosu od 5.304,06 KM, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk. prih. %
1	Članarina	0,00	0,00%
2	Prilozi fizičkih lica	0,00	0,00%
3	Prilozi pravnih lica	0,00	0,00%
4	Prihodi od imovine	4,06	0,08%
5	Prihodi od pr.lica	0,00	0,00%
6	Prihodi od poklona	5.300,00	99,92%
7	Prihodi iz budžeta	0,00	0,00%
	Ostali prihodi	0,00	0,00%
	<b>Ukupni prihodi:</b>	<b>5.304,06</b>	<b>100,00%</b>

U godišnjem finansijskom izvještaju stranka je iskazala ukupne rashode u iznosu od 162.021,33 KM.

## 2. PREDSTAVLJANJE POLITIČKE STRANKE

Naziv političke stranke: Hrvatski demokršćani. Skraćeni naziv: Demokršćani.

Dana 07.11.1998. godine stranka je upisana u registar Višeg suda u Mostaru rješenjem broj: R:2/98. Rješenjem Općinskog suda Mostar, broj: R/3-11 od 21.02.2012. godine, Hrvatski Demokršćani su prestali sa radom i brisani su iz registra političkih stranaka radi udruživanja. Istim rješenjem je u Registar političkih organizacija-stranaka Općinskog suda Mostar upisano Udruživanje političkih stranaka pod nazivom Hrvatski demokršćani i Hrvatsko zajedništvo Herceg-Bosne u političku stranku Hrvatska stranka prava Bosne i Hercegovine, koja postaje pravni sljednik ovih stranaka.

Sjedište političke stranke je u Mostaru, K.M.V. Humskog br. 39<sup>1</sup>.

Ovlaštena lica za zastupanje Hrvatski demokršćana u 2011. godini su Ivan Milić, predsjednik i Dario Pandža, glavni tajnik.

Lice ovlašteno za podnošenje finansijskih izvještaja za 2011. godinu je Kevsera Oručević.

Prema podacima iz godišnjeg finansijskog izvještaja za 2011. godinu, Hrvatski demokršćani imaju sljedeću organizacionu strukturu:

- Vrhovno (Krizno) vijeće.

<sup>1</sup> Sjedište Demokršćana u 2011. godini je bilo u Mostaru, ulica Franjevačka 52 A.

### **3. OPIS PREGLEDA I KONTROLE FINANSIJSKOG IZVJEŠTAJA**

**Predmet pregleda i kontrole** je godišnji finansijski izvještaj Hrvatskih demokršćana za 2011. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskih izvještaja Hrvatskih demokršćana obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

### **4. PRETHODNE KONTROLE I REVIZIJE**

Služba za reviziju je izvršila pregled, kontrolu i reviziju finansijskih izvještaja Hrvatskih demokršćana za period od 2005. do 2010. godine, nakon čega su izdati izvještaji o pregledu, odnosno izvještaji o reviziji sa nalazima revizije, mišljenjem revizora i preporukama.

Nakon obavljenog pregleda finansijskog izvještaja za 2010. godinu, izdat je izvještaj sa nalazima revizije, mišljenjem revizora i preporukama stranci da treba postupati u skladu sa odredbama člana 11. stav (1) i stav (3) Zakona o finansiranju političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2011. godinu, utvrđeno je da politička stranka i dalje krši odredbe člana 11. stav (1) i stav (3) Zakona o finansiranju političkih stranaka.

### **5. NALAZI I PREPORUKE**

#### **5.1. NALAZI**

**Hrvatski demokršćani prekršili su odredbe člana 11. stav (1) i stav (3) Zakona o finansiranju političkih stranaka.**

Pregledom godišnjeg finansijskog izvještaja utvrđeno je da Hrvatski demokršćani nisu vodili potpune knjigovodstvene evidencije o svojim prihodima i rashodima, što je suprotno odredbama člana 11. stav (1) Zakona o finansiranju političkih stranaka.

- Stranka nije u svojim poslovnim knjigama evidentirala nenovčane donacije u ukupnom iznosu od 5.300,00 KM, troškove zakupa poslovnih prostorija u iznosu od 4.800,00 KM i troškove knjigovodstvenih usluga u iznosu od 500,00 KM. Stranka je nenovčane donacije i troškove iskazala u obrascima 3-e (nenovčane donacije i računi koje stranka nije imala obavezu da plati) i 4-1 (režijsko-administrativni i ostali troškovi) godišnjeg finansijskog izvještaja.

- Uvidom u poslovne knjige, utvrđeno je da stranka nije evidentirala troškove električne energije i troškove telefonskih usluga za novembar i decembar 2011. godine, odnosno da nije iskazala obaveze prema dobavljačima. Stranka ove troškove nije iskazala ni u obrascima godišnjeg finansijskog

izvještaja za 2011. godinu, čime je prekršila odredbe člana 11. stav (3) Zakona o finansiranju političkih stranaka i člana 20. i 21. Pravilnika o godišnjim finansijskim izvještajima političkih stranaka.

## **5.2. PREPORUKE**

*Preporučuje se Hrvatskim demokršćanima da se pridržavaju odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da u skladu sa odredbama člana 11. stav (1) Zakona o finansiranju političkih stranaka vode potpune evidencije o svojim prihodima i rashodima, i*
- *da, u skladu sa odredbama člana 11. stav (3) Zakona o finansiranju političkih stranaka, finansijske izvještaje koje podnose Centralnoj izbornoj komisiji BiH popunjavaju u skladu sa Pravilnikom o godišnjim finansijskim izvještajima političkih stranaka.*

## **KOMENTAR:**

U ostavljenom roku, Hrvatski demokršćani su dostavili odgovor na Preliminarni izvještaj o pregledu godišnjeg finansijskog izvještaja za 2011. godinu u kojem nisu dali primjedbe na nalaze Službe za reviziju.

Mr. Hasida Gušić, šef Službe za reviziju

Sanja Čabrilo, revizor